

**BOSNA I HERCEGOVINA
AGENCIJA ZA ANTIDOPING KONTROLU**



ANTIDOPING RJEČNIK



www.ada.gov.ba

ADAMS („Antidoping Administration and Management System“)

je internetska baza podataka koja služi za unošenje, pohranjivanje, dijeljenje i izvještavanje, napravljena na način da pomaže zainteresovanim stranama i WADA u antidoping djelovanju, u skladu s propisima o zaštiti podataka.

Arbitražni sud za sport - (CAS)

Institucija koja je nezavisna od bilo koje sportske organizacije i pruža usluge kako bi se olakšalo rješavanje sportskih sporova vezanih uz arbitražu ili posredovanje putem proceduralnih pravila prilagođenih specifičnim potrebama sportskog svijeta. CAS se često naziva "Sportskim vrhovnim sudom". WADA ima pravo žalbe CAS-u za doping slučajeve u nadležnosti organizacija koje su implementirale Svjetski antidoping Kodeks.

Athlete Outreach Program

Program koji cilja na edukaciju sportista o opasnostima i posljedicama dopinga, te njihova prava i odgovornosti u procesu doping kontrola. WADA-in Athlete Outreach Program je počeo u 2001, te je proveden na desecima velikih multidisciplinarnih sportskih manifestacija. Athlete Outreach Program sačinjava tim sastavljen od antidoping stručnjaka iz cijelog svijeta koji rade u interakciji sa sportistima s ciljem podizanja svijesti o doping.

Atipičan laboratorijski nalaz - (Atypical finding)

Izvještaj iz laboratorija ili od druge, od WADA odobrene organizacije, koji zahtjeva daljnju istragu u skladu s Međunarodnim standardima za laboratorije ili odgovarajućim tehničkim dokumentima prije utvrđivanja postojanja nepovoljnog laboratorijskog nalaza.

Ciljano testiranje - (Target Testing)

Biranje sportista za testiranje, pri čemu se tačno određeni sportisti ili grupe sportista sistemski i ciljano biraju za testiranje u tačno određeno vrijeme.

Doping kontrola - (Doping control)

Proces doping kontrole uključuje: planiranje i raspodjelu testova, prikupljanje uzoraka, rukovanje uzorcima, laboratorijske analize, izuzeća u terapijske svrhe, upravljanje rezultatima, rasprave i žalbe.

Doping kontrolor - (Doping Control Officer (DCO))

Službenik koji je obučen i ovlašten od strane antidoping organizacije, sa jasno određenim odgovornostima u rukovođenju pri uzimanju uzoraka na licu mjesta.

Državni savez - (National Federation)

Državni savez koji rukovodi jednim ili više sportova na državnom nivou.

Državna organizacija za borbu protiv dopinga - (National Anti Doping Organization (NADO))

Subjekt koji svaka država ovlašćuje i proglašava primarno odgovornom za prihvatanje i provođenje pravila borbe protiv dopinga, za direktno prikupljanje uzoraka, upravljanje rezultatima i vođenje saslušanja, a sve to na državnom nivou. Ovo uključuje tijelo koje može biti određeno od većeg broja država da služi kao regionalna organizacija za borbu protiv dopinga za te države. Ako nadležna vlast nije imenovala takav subjekt, ulogu

subjekta preuzima nacionalni olimpijski komitet dotične države ili subjekt kojega on sam odredi.

Državni olimpijski komitet - (National Olympic Committee)

Organizacija priznata od strane Međunarodnog olimpijskog komiteta. Izraz državni olimpijski komitet će takođe obuhvatati i državnu sportsku konfederaciju u zemljama u kojim državna sportska konfederacija preuzima odgovornosti u oblasti borbe protiv dopinga koje inače obavlja državni olimpijski komitet.

Granična supstanca - (Threshold Substance)

Supstanca koja je na Listi zabranjenih sredstava za koju se otkrivanje i određivanje količine koja je veća od dozvoljenog praga smatra „Nepovoljnim analitičkim nalazom“.

Implementacija Kodeksa - (Implementation of the Code)

Znači da će organizacija za borbu protiv dopinga mijenjati svoja pravila i politike i u svoja dokumenta uključiti članove i načela Svjetskog antidoping Kodeksa.

Informacije o lokaciji - (Whereabouts information)

Informacije koje dostavlja sportista ili neko u ime sportiste, a koje sadrže detalje lokacije sportiste na dnevnoj bazi, kako bi se omogućila nenajavljena testiranja.

Izuzeće u terapijske svrhe - (Therapeutic Use Exemption (TUE))

Dozvola dodijeljena sportisti od strane antidoping organizacije da, u terapijske svrhe, koristi supstance ili metode koje se nalaze na Listi zabranjenih sredstava.

Kontrola bez prethodne najave - (No Advance Notice)

Doping kontrola koja se provodi bez prethodnog upozorenja sportisti i tokom koje sportista biva stalno praćen, od trenutka obavještenja o kontroli do završetka postupka uzimanja uzorka.

Kopenhagenska deklaracija - (Copenhagen Declaration)

Kopenhagenska deklaracija (Copenhagen Declaration on Anti-Doping in Sport) je politički dokument kroz koji se vladama signalizira namjera da usvoje Svjetski antidoping Kodeks kroz UNESCO Međunarodnu konvenciju protiv dopinga u sportu. Kopenhagenska deklaracija završena je od strane vlada na drugoj Svjetskoj konferenciji o dopingu u sportu u Kopenhagenu u martu 2003.

Korištenje - (Use)

Upotreba, primjenjivanje, gutanje, injektiranje ili konzumiranje svake zabranjene supstance i ili zabranjene metode, na bilo koji način.

Krivotvorenje - (Tampering)

Mijenjanje za neprimjerenu svrhu ili na neprimjeren način; neprilično uticanje; neprilično uplitanje; ometanje, navođenje na krivi trag ili upuštanje u bilo kakve radnje prevare zbog mijenjanja rezultata ili zbog sprječavanja provođenja uobičajenih postupaka; ili davanje lažnih podataka organizaciji za borbu protiv dopinga.

Kršenje antidoping pravila - (Anti-Doping Rule Violation (ADRV))

Utvrđivanje da je došlo do kršenja jednog od sljedećih pravila navedenih u Kodeksu:

1. Prisustvo zabranjene supstance, njenih metabolita ili markera u uzorku sportiste;
2. Korištenje ili pokušaj korištenja zabranjenih supstanci ili zabranjenih metoda od strane sportiste;
3. Odbijanje ili propuštanje davanja uzorka bez uvjerljivog objašnjenja nakon što sportista bude obavješten u skladu sa primjenjivim antidoping pravilima, kao i svako drugo izbjegavanje davanja uzorka.
4. Kršenje primjenjivih uslova s obzirom na dostupnost sportiste za doping kontrolu izvan takmičenja, uključujući nepodnesenu, a traženu informaciju o lokaciji i propuštena testiranja koja se temelje na pravilima koja su u skladu s Međunarodnim standardima za testiranje;
5. Neovlašteno miješanje ili pokušaj miješanja u bilo koji dio doping kontrole;
6. Posjedovanje zabranjenih supstanci i metoda;
7. Nedopušteno trgovanje ili pokušaj nedopuštenog trgovanja zabranjenim supstancima ili zabranjenim metodama;
8. Davanje ili pokušaj davanja sportisti bilo koje zabranjene supstance ili metode koja je zabranjena prilikom testiranja izvan takmičenja kao i pomaganje, poticanje, promociju, prikrivanje ili svaka druga vrsta saučesništva, koje uključuje kršenje ili bilo kakav pokušaj kršenja antidoping pravila.

Lanac čuvanja (Chain of Custody)

Slijed pojedinaca ili organizacija, koji imaju odgovornost za čuvanje uzorka uzetog u doping kontroli, od vremena uzimanja uzorka do vremena kad uzorak bude primljen u laboratoriju na analizu.

Lične informacije - (Personal information)

Informacije, uključujući osjetljive lične informacije bez ograničenja, koje se odnose na identifikovanog učesnika ili na učesnika kojeg je moguće identifikovati ili koje se odnose na druga lica čije su informacije obrađene potpuno u kontekstu antidoping aktivnosti antidoping organizacije.

Lista zabranjenih sredstava - (Prohibited List)

Lista identifikovanih zabranjenih supstanci i metoda u sportu. Lista zabranjenih sredstava je jedan od četiri WADA međunarodna standarda i obavezna je za potpisnice Svjetskog antidoping Kodeksa.

Maloljetnik - (Minor)

Fizička osoba koja nije dostigla punoljetnost u smislu važećih propisa njegove države.

Marker - (Marker)

Smjesa, skupina spojeva ili bioloških parametara, koja označava upotrebu zabranjenih supstanci ili zabranjenih metoda.

Međunarodni savez - (International Federation (IF))

Međunarodna nevladina organizacija koja upravlja jednim ili više sportova na globalnom nivou.

Međunarodni događaj - (International Event)

Sportski događaj u kome je Međunarodni olimpijski komitet, Međunarodni paraolimpijski komitet ili međunarodni savez organizator najvećeg sportskog događaja, ili je neka druga međunarodna sportska organizacija upravni organ tog događaja i imenuje tehničko osoblje za taj događaj.

Međunarodni standard - (International Standard)

Dokument usvojen od strane WADA za podršku Svjetskom antidoping Kodeksu. Kao dio Svjetskog antidoping programa,

WADA je razvila pet međunarodnih standarda čiji je cilj harmonizacija između antidoping organizacija u tehničkim oblastima:

- Lista zabranjenih sredstava,
- Međunarodni standard za testiranje,
- Međunarodni standard za laboratorije,
- Međunarodni standard za izuzeće u terapijske svrhe.
- Međunarodni standard za zaštitu privatnosti i ličnih podataka.

Harmonizacija u globalnoj borbi protiv dopinga se postiže poštovanjem Svjetskog antidoping programa (WADP) od strane svih učesnika.

Postoje tri nivoa WADP:

- Kodeks,
- Međunarodni standardi,
- Modeli najboljih iskustava iz prakse.

Zakon i međunarodni standardi su obavezni za one koji učestvuju u WADP.

Metabolit - (Metabolite)

Bilo koja supstanca proizvedena biološkim procesima.

Modeli najbolje prakse - (Models of Best Practice)

Model pravila, smjernica i jednostavnih formi razvijeni od strane WADA zasnivaju se na Svjetskom antidoping Kodeksu i Međunarodnim standardima kako bi obezbijedili posljednja dostignuća u različitim područjima antidopinga. Ove modele, koji su dio Svjetskog programa za borbu protiv dopinga, WADA preporučuje svojim partnerima, ali njihovo provođenje nije obavezno.

Načelo objektivne odgovornosti - (Strict Liability Principle)

Načelo objektivne odgovornosti znači da se prekršaj antidoping pravila dogodi svaki put kad se zabranjena supstanca (njeni metaboliti ili markeri) nalazi u uzorku sportiste, bez obzira da li je sportista namjerno ili nenamjerno koristio zabranjene supstance ili je bio nemaran ili na drugi način kriv.

Nasumični odabir - (Random Selection)

Odabir sportista za testiranje koje nije ciljano testiranje. Nasumični odabir može biti: potpuno nasumični (gdje nisu uzete u obzir prethodno definisani kriteriji, i sportisti odabrani proizvoljno sa liste ili grupe imena sportista); ili po važnosti (gdje su sportisti izabrani koristeći prethodno definisane kriterije da bi se povećale ili smanjile šanse za izbor).

Nedopušteno trgovanje - (Trafficking)

Prodavanje, davanje, snabdijevanje, slanje, isporučivanje ili raspačavanje zabranjene supstance i/ili zabranjene metode (fizički ili elektronski ili drugim sredstvima) od strane sportista, pomoćnog osoblja sportiste ili od bilo koje druge lica koja je pod nadležnošću organizacije za borbu protiv dopinga; s tim da ova definicija ne uključuje postupke u dobroj vjeri medicinskog osoblja koji uključuju zabranjenu supstancu korištenu u stvarnu i zakonitu terapijsku svrhu ili drugo prihvatljivo opravdanje i ne obuhvata djelovanja koja uključuju zabranjene supstance koje nisu zabranjene na testiranjima izvan takmičenja osim ukoliko sveukupne okolnosti ukazuju na to da se zabranjene supstance ne namjeravaju koristiti u stvarne i zakonite terapijske svrhe.

Nepovoljan laboratorijski nalaz - (Adverse Analytical Finding)

Izveštaj iz laboratorija ili druge od WADA ovlaštene ustanove kojim se u skladu s Međunarodnim standardom za laboratorije i odgovarajućim tehničkim dokumentima u uzorku utvrđuje prisutnost zabranjenih supstanci ili njezinih metabolita ili markera (uključujući povišene količine endogenih supstanci) ili dokaz o upotrebi zabranjenih metoda. Nepovoljni analitički nalaz ne mora nužno dovesti do kršenja antidoping pravila, pošto sportista može imati izuzeće u terapijske svrhe za ovu supstancu.

Nezavisni posmatrači - (Independent Observers (IO))

Tim antidoping stručnjaka za veliki sportski događaj koje ovlašćuje i nadzire WADA, a koji obavljaju nadgledanje, reviziju, izvještavaju o rezultatima doping kontrola i upravljanju procesima na tom događaju.

Odgovorna antidoping organizacija - (Responsible ADO)

Antidoping organizacija sa odgovornošću u odnosu na mjesto prebivališta

Odgovorni za testiranja - (Testing Authority)

Međunarodni olimpijski komitet, Međunarodni paraolimpijski komitet, WADA, međunarodni savezi, državni sportski savezi, državni olimpijski komitet, državni paraolimpijski komitet, organizatori velikih sportskih događaja/igara, ili drugi organi odgovorni za sakupljanje i transport uzoraka bilo na takmičenju ili izvan takmičenja i / ili za upravljanje rezultatima testiranja.

Oprema za prikupljanje uzoraka - (Sample Collection Equipment)

Posude ili aparatura koja se koristi za direktno sakupljanje ili držanje uzorka u bilo koje vrijeme za vrijeme procesa prikupljanja uzoraka.

Oprema za prikupljanje uzoraka urina mora se, najmanje, sastojati od: posude za prikupljanje uzorka pri napuštanju tijela sportiste, zapečaćene i trakom osigurane boce i trakice za osiguravanje uzorka, pribor za parcijalne uzorke;

Oprema za prikupljanje uzoraka krvi mora se, najmanje, sastojati od: igle za prikupljanje uzorka, epruvete sa zapečaćenom i trakom zaštićenom opremom za držanje uzorka.

Opunomoćenik - (Third-Party Agent)

Fizičko ili pravno lice, javni autoritet, agencija ili tijelo, uključujući podugovarače i njihove podugovarače bez ograničenja, koji obrađuju lične informacije za ili u ime antidoping organizacije.

Organizacija za borbu protiv dopinga - (Anti-doping Organization)

Potpisnik koji je odgovoran za prihvatanje pravila o uvođenju, pokretanju ili provođenju bilo kojeg dijela postupka doping kontrole. Taj pojam obuhvata npr. Međunarodni olimpijski odbor, Međunarodni paraolimpijski odbor, organizatore velikih sportskih takmičenja koji provode testiranja na svojim takmičenjima, WADA-u, Međunarodne saveze i državne organizacije za borbu protiv dopinga.

Organizatori velikih sportskih događaja/igara - (Major Event/Games Organization)

Kontinentalna udruženja državnih olimpijskih odbora i druge međunarodne multidisciplinarne sportske organizacije koje djeluju kao upravna tijela svakog kontinentalnog, regionalnog ili drugog međunarodnog sportskog događaja.

Osjetljive lične informacije - (Sensitive Personal Information)

Lične informacije koje se tiču rasnog ili etničkog porijekla sportiste, određivanja prekršaja (krivičnih ili drugih), zdravlja (uključujući i informacije dobivene analizom uzorka sportiste) i genetskih informacija.

Osoblje za prikupljanje uzoraka - (Sample Collection Personnel)

Tim kvalifikovanih službenika ovlaštenih od strane antidoping agencije, koji mogu izvršiti ili asistirati kroz dužnosti „Procesa prikupljanja uzoraka“.

Pokušaj - (Attempt)

Namjerno upuštanje u radnju koja značajno određuje tok sveukupnog ponašanja što je isplanirano tako da kulminira kršenjem pravila o kontroli i zabrani korištenja dopinga. Pod uslovom, međutim, da se kršenje pravila o zabrani korištenja dopinga ne smije ustanoviti samo na osnovu pokušaja činjenja prekršaja ako se osoba odrekne pokušaja prije nego što ga otkrije treća strana koja nije uključena u pokušaj.

Pomoćno osoblje sportiste - (Athlete Support Personnel)

Svaki instruktor, trener, menadžer, posrednik, timski radnik, ljekar ili član pomoćnog medicinskog osoblja, roditelj ili bilo koja druga osoba koja radi sa sportistima koji učestvuju u pripremama za učestvovanje u sportskom takmičenju, ili ih liječe.

Posljedice kršenja antidoping pravila - (Consequences of Anti-Doping Rules Violations)

Kršenje pravila o doping kontroli od strane sportiste ili drugih lica, može rezultirati jednom od sljedećih posljedica:

- a) Diskvalifikacija znači da se rezultati sportiste proglašavaju nevažećima na određenom takmičenju ili sportskom događaju, sa svim pratećim posljedicama, uključujući gubitak prava na sve medalje, bodove i nagrade;

- b) Zabrana učešća znači da se sportisti ili drugoj osobi kroz tačno određeno razdoblje zabranjuje učešće u svim takmičenjima ili drugim aktivnostima, ili u osiguravanju finansijskih sredstava; i
- c) Privremena suspenzija znači da se sportisti ili drugoj osobi privremeno zabranjuje učestvovanje na svim takmičenjima prije konačne odluke na saslušanju koje se provodi na propisani način. (Pravo na pravedno saslušanje).

Potpisnici - (Signatories)

Subjekti koji potpisuju Kodeks i pristaju pridržavati ga se, uključujući Međunarodni olimpijski komitet, Međunarodne saveze, Međunarodni paraolimpijski komitet, državne olimpijske komitete, državne paraolimpijske komitete, organizatore velikih takmičenja, državne organizacije za borbu protiv dopinga, i WADA.

Pratilac - (Chaperone)

je službena osoba koja je obučena i ovlaštena od strane antidoping organizacije za obavljanje određenih dužnosti, uključujući sljedeće:

- obavještanje sportiste da je odabran za doping kontrolu,
- praćenje i promatranje sportiste sve do dolaska u stanicu za doping kontrolu,
- svjedočenje i potvrda davanja uzorka.

Proces prikupljanja uzoraka - (Sample Collection Session)

Niz aktivnosti koji direktno uključuju sportistu od trenutka obavještanja pa dok sportista ne napusti stanicu za doping kontrolu nakon što je dao svoj uzorak / uzorke.

Propušteni test - (Missed Test)

Situacija kad sportista nije na raspolaganju za testiranje bilo kojeg dana na mjestu i u vrijeme koje je navedeno u lokacijskom obrascu za taj dan.

Regionalna antidoping organizacija RADO - (Regional Anti-Doping Organization RADO)

Antidoping organizacija osnovana od strane grupe zemalja da koordinira, upravlja i isporuči mandat za sport bez dopinga u određenom regionu. WADA-in razvojni antidoping program ima za cilj da olakša stvaranje takvih subjekata kako bi se osiguralo sprovođenje antidoping programa u svim dijelovima svijeta.

Registrovana test grupa - (Registered Testing Pool)

Grupa vrhunskih sportista koju uspostavlja svaki međunarodni savez (IF) i državna organizacija za borbu protiv dopinga (NADO), a koji podliježu testiranju na takmičenju i zvan takmičenja u okviru planiranog rasporeda testiranja tog Međunarodnog saveza (IF) ili državne organizacije za borbu protiv dopinga (NADO).

Sportista - (Athlete)

Svaka osoba koja učestvuje u sportu na Međunarodnom nivou (kako je definiše svaki međunarodni savez), na državnom nivou (kako je definiše svaka državna organizacija za borbu protiv dopinga uključujući, ali se ne ograničavajući na lica u njenoj registrovanoj test grupi), svaki drugi takmičar u sportu koji je inače pod nadležnošću bilo koje potpisnice ili druge sportske organizacije koja je prihvatila Kodeks. Sva pravila u Kodeksu, uključujući

npr. testiranje i terapijska izuzeća, moraju se primjenjivati na sportiste Međunarodnog i državnog nivoa.

Sportski događaj - (Event)

Niz pojedinačnih takmičenja koja se održavaju zajedno, pod jednim upravnim tijelom (npr. Olimpijske igre, Svjetska plivačka takmičenja FINA-e, itd.)

Supstanca zabranjena bez obzira na količinu (Non-Threshold Substance)

Supstanca koja je na Listi zabranjenih sredstava za koju se dokumentovano otkrivanje bilo koje količine smatra kršenjem antidoping pravila.

Stanica za doping kontrolu - (Doping Control Station (DCS))

Mjesto gdje se provodi uzimanje uzorka.

Svjetski antidoping kodeks - (World Anti-Doping Code)

Svjetski antidoping kodeks je osnovni dokument koji pruža usklađeni okvir za antidoping politike, pravila i propisa unutar sportskih organizacija i između javnih vlasti.

Takmičenje - (Competition)

Jedna trka, utakmica, igra ili jedno pojedinačno sportsko takmičenje. Na primjer, košarkaška utakmica ili finalna atletska olimpijska trka na 100 metara. Za etapne utrke ili druga sportska takmičenja tokom kojih se nagrade dodjeljuju na dnevnoj ili nekoj drugoj osnovi, razliku između pojedinačnog takmičenja i sportskog događaja treba odrediti shodno pravilima pojedinog Međunarodnog saveza.

Testiranje - (Testing)

Dijelovi procesa doping kontrole, koji uključuje planiranje i raspodjelu testova, prikupljanje uzoraka, rukovanje uzorcima i transport uzoraka do laboratorije.

Testiranje izvan takmičenja - (Out-of-Competition)

Svaka doping kontrola koja se ne provodi na takmičenju.

Testiranje na takmičenju - (In-Competition)

Izuzev ako je to drugačije propisano pravilima Međunarodnog saveza ili druge relevantne nacionalne organizacije za borbu protiv dopinga, testiranje na takmičenju znači razdoblje koje obuhvata 12 sati prije takmičenja na kojem će sportista sudjelovati pa sve do kraja takmičenja i postupak prikupljanja uzorka u vezi s tim takmičenjem.

Timski sport - (Team Sport)

Sport u kojem se dopušta zamjena igrača u toku takmičenja.

Trajanje događaja - (Event Period)

Razdoblje između početka i kraja događaja određeno od strane tijela koje upravlja događajem.

Treće lice - (Third Party)

Svako fizičko lice ili pravno lice osim onog na koje se lične informacije odnose, antidoping organizacije i opunomoćenici.

UNESCO konvencija - (UNESCO Convention)

Međunarodna konvencija protiv dopinga u sportu (UNESCO Konvencija) je razvijena od strane vlada pod okriljem UNESCO-a. Jednoglasno je usvojena od strane Generalne skupštine UNESCO-a, 19. oktobra 2005. Trenutno je ratifikovana od strane vlada pojedinačno. To je pravni alat koji omogućava vladama da usklade domaće politike sa Svjetskim antidoping kodeksom.

Upravljanje rezultatima - (Results Management)

Proces pred raspravu, upravljanje potencijalnim prekršajima antidoping pravila. Taj proces naročito obuhvata početni pregled nepovoljanog laboratorijskog nalaza (određivanje da li se primjenjuje odobreno izuzeće u terapijske svrhe, obavijest sportisti o njegovom pravu da zatraži analizu B-uzorka) i moguće nametanje privremene suspenzije. WADA nikada nije uključena u upravljanje pojedinačnim nalazima, koji potpadaju pod odgovornost antidoping organizacija uključenih u konkretan slučaj.

Usaglašenost sa Kodeksom - (Code Compliance)

Znači da je organizacija za borbu protiv dopinga izmijenila pravila i politike i prilagodila ih poštivanju obaveznih članova i načela Svjetskog antidoping Kodeksa i njegovom provođenju.

Uzimanje uzoraka - (Sample Collection Session)

Uključuje sve pojedinačne aktivnosti u koje je direktno uključen sportista, od obavještanja do napuštanja stanice za doping kontrolu nakon što je dao uzorak.

Uzorak - (Sample / Specimen)

Bilo koji biološki materijal prikupljen za potrebe doping kontrola.

WADA

Svjetska antidoping agencija (WADA) je nezavisna međunarodna organizacija osnovana 1999. za promociju, koordiniranje i praćenje borbe protiv dopinga u sportu u svim svojim oblicima na međunarodnom nivou. Agencija se sastoji i finansira podjednako od olimpijskog pokreta i vlada svjetskih država. Njene ključne aktivnosti uključuju naučno istraživanje, obrazovanje, testiranje izvan takmičenja, razvoj antidoping kapaciteta i praćenje svjetskog antidoping kodeksa.

WADA akreditirani laboratorij - (WADA-Accredited Laboratory)

Akreditirani antidoping laboratorij od strane WADA u skladu s Međunarodnim standardom za laboratorije, primjenom metoda i postupaka ispitivanja kako bi obezbijedio dokazne podatke za otkrivanje i, ako je primjenljivo, kvantifikaciju praga količine supstanci na Listi zabranjenih sredstava u urinu i drugim biološkim uzorcima. WADA je odgovorna za akreditovanje i reakreditovanje antidoping laboratorija od 2004.

WADA Izvršni odbor - (WADA Executive Committee)

WADA-ino vrhovno tijelo odgovorno za oblikovanje politike, upravljanje i vođenje Svjetske antidoping Agencije, uključujući obavljanje djelatnosti i upravljanje imovinom.

WADA Radni odbori - (WADA Working Committees)

Savjetodavni odbori pružaju smjernice za WADA programe u određenim područjima.

WADA ima četiri radna odbora:

1. Odbor za sportiste,
2. Odbor za zdravlje, medicinu i istraživanje (i pododbore: Lista zabranjenih sredstava, Izuzeća u terapijske svrhe, Laboratorij, i Panel za genetski doping),
3. Odbor za obrazovanje;
4. Odbor za finansije i administrativni odbor.

WADA Upravni odbor - (WADA Foundation Board)

WADA-ino vrhovno tijelo za odlučivanje i kontroliranje. Tijelo se podjednako sastoji od predstavnika olimpijskog pokreta i državnih vlada.

Zabranjena metoda - (Prohibited Method)

Svaka metoda koja je proglašena zabranjenom na Listi zabranjenih sredstava.

Zabranjena supstanca - (Prohibited Substance)

Svaka supstanca koja je proglašena zabranjenom na Listi zabranjenih sredstava.



**BOSNA I HERCEGOVINA
AGENCIJA ZA ANTIDOPING KONTROLU**

**Maršala Tita 36 , 75 000 Tuzla
Bosna i Hercegovina**

Tel: +387 35 310 690

Fax: +387 35 310 691

E-mail: info@ada.gov.ba

<http://www.ada.gov.ba>



Agencija za antidoping kontrolu BiH